



Broj: 01/1-02-1205/14
Ilijaš, 30. 05. 2014. godine

ZAPISNIK

sa 19. (devetnaeste) sjednice Općinskog vijeća Ilijaš održane dana 29. 05. 2014. godine, sa početkom u 10h.

Devetnaestom sjednicom OV-a Ilijaš je predsjedavao predsjedavajući OV-a g-din Damir Filipović
Prisutni vijećnici:

RB.	IME I PREZIME
SDA	
1	-
2	-
3	SAUDIN DURMIĆ
4	HALID DIZDAREVIĆ
5	AMAR DOVADŽIJA
6	MUAMER DERVIŠEVIĆ
7	FAHIR HASANOVIĆ
8	RASIM ŠEHIĆ
9	SELMA PUŠINA
SDP	
10	ALAN ŠERAK
11	MARIONETA ILIĆ-JURETA
12	DAMIR FILIPOVIĆ
13	SELVER HERIĆ
SBB	
14	ADEM EFENDIĆ
15	NIJAZ MAŠIĆ
16	SEAD ŠEHIĆ
17	AKIF BEŠLIJA
SAMOSTALNI VIJEĆNICI	
18	EDHEM HASANOVIĆ
19	ASIM MUJIĆ
20	NIHAD BUČUK
STRANKA ZA SREDNJE	
21	BESIM GLJIVA
22	AIDA MALIŠEVIĆ
LDS	
23	-

	BPS
24	MUHAMED HANDŽIĆ
	SAMOSTALNI VIJEĆNIK
25	DIZDAREVIĆ ENES

Odsutni vijećnici:

1. Mahir Dević
2. Nedim Matoruga
3. Nijaz Rastoder

Prisutni gosti:

1. Nermina Durić-Kahvedžić - Radio Ilijaš
2. RTV Vogošća
3. Nihad Gavranović – predstavnik OSCE-a
4. Nevres Alispahić – izvršni direktora "Sarajevo-šuma"
5. Denis Kahrman - Sarajevo-šume
6. Almir Špiodić – predsjednik Savjeta MZ Podlugovi
7. Alen Matoruga – predsjednik Savjeta MZ Misoča
8. Mehmed Smajlović – predsjednik Savjeta MZ Mrakovo
9. Dževad Alispahić – predsjednik Savjeta MZ Ljubnići

Ostali prisutni:

1. Akif Fazlić – općinski načelnik
2. Nijaz Spahić – pomoćnik načelnika
3. Zdravko Barić – pomoćnik načelnika
4. Merima Osmanović – pomoćnik načelnika
5. Sanja Zagorac-Jozić – pomoćnik načelnika
6. Alma Imamović – pomoćnik načelnika
7. Sadeta Brkić – pomoćnik načelnika
8. Meliha Avdibegović – pomoćnik načelnika
9. Ilda Kahrman – sekretar OV-a
10. Adha Masnopita – stručni saradnik u Službi za društvene djelatnosti
11. Maida Habibović – zapisničar.

Predsjedavajući je otvorio sjednicu i konstatovao da postoji kvorum za odlučivanje.

Zatim je dao na razmatranje zapisnik sa 18.sjednice OV-a.

Primjedbi na zapisnik nije bilo, pa je OV-a jednoglasno usvojilo zapisnik sa 18. sjednice OV-a.

Pročitao je predloženi dnevni red i dao na razmatranje.

Primjedbi nije bilo, pa je OV-e jednoglasno usvojilo slijedeći

DNEVNI RED

1. Vijećnička pitanja i inicijative
2. Izvještaj o realizaciji zaključaka sa 18.sjednice OV-a, zaključka sa 17. i zaključka sa 16.sjednice

3. Informacija Civilne zaštite Općine Ilijaš o trenutnom stanju na području općine Ilijaš, prouzrokovano elementarnim nepogodama
4. Prijedlog Odluke o privremenom korišćenju javnih površina na području opštine Ilijaš
5. Prijedlog Odluke o davanju saglasnosti za zaključenje ugovora o korištenju gradskog nogometnog stadiona u Ilijašu
6. Prijedlog Odluke o davanju saglasnosti na Godišnji plan gospodarenja šumama za ŠPP "Gornjebosansko" za 2014.godinu
7. Prijedlog Odluke o odbijanju ponude o preuzimanju neizgrađenog građevinskog zemljišta (k.č.br.41/7, 41/8, 41/9 i 41/10)
8. Prijedlog Odluke o prestanku statusa nepokretnosti u općoj upotrebi zemljište označeno kao k.č.br.587/5
9. Prijedlog rješenja iz imovinsko-pravne oblasti:
 - a) rješenje broj:06/1-31-1260/14/HM
 - b) rješenje broj:06/1-31-1542/14/HM
 - c) rješenje broj:06/1-31-3430/12/VF
 - d) rješenje broj:06/1-31-767/14/VF
 - e) rješenje broj:06/1-31-1296/14/HM
 - f) rješenje broj:06/1-31-482/13/VF
10. Informacija o izvršenju Budžeta općine Ilijaš za period 01.01.-31.03.2014.godine
11. Informacija iz oblasti šumarstva i eksploatacije kamena.

AD-1

Vijećnička pitanja i inicijative

MARIONETA ILIĆ-JURETA – vijećnica SDP-a

Inicijative:

1. Da se što prije urade mostovi koji su odneseni u naselju Povoča kod Zora Emira i u naselju Ljubina kod Genjac Muhameda, kako bi im se omogućio pristup glavnoj putnoj komunikaciji.
2. Da se pod hitno očiste kanali za odvod oborinskih voda prema naselju Solakovići kako bi se spriječilo dalje klizište i oštećenje asfaltnog puta, te isti popravi koliko je moguće.
3. Da se skloni nasip sa puta prema Koritima kako bi stanovništvo moglo normalno funkcionisati.
4. Pokrećem inicijativu u vidu zaključka da današnju dnevnicu izdvojimo za poplavljena područja.

MUHAMED HANDŽIĆ – vijećnik BPS-SEFER HALILOVIĆ

Pitanja:

1. Pod kojim uslovima je dozvoljena izgradnja i korištenje tzv. ljetne bašte vlasniku ugostiteljskog objekta "Mistik" i ako je dozvoljena da li je u skladu sa Zakonom o privremenom korištenju javnih površina na području Kantona Sarajevo ?
2. Da li komunalni inspektor Općine Ilijaš vrši kontrolu zauzimanja i korištenja javnih površina od strane pravnih lica i da li ugovorene reference po tom pitanju odgovaraju stvarnom stanju na terenu ?

SELVER HERIĆ – vijećnik SDP-a

Nezadovoljan sam odgovorom na vijećničko pitanje, a vezano za ulicu za koju smo digli kredit od milion KM. Odgovor koji sam dobio, imam osjećaj da je odgovar djece iz petog razreda osnovne škole. Moje pitanje je glasilo da mi se za prošlu godinu i za svaki mjesec ove godine, dostavi koliko ko, po rješenju, ima pravo koristiti ulicu 126.Ilijaške brigade (glavnu) i koliko ko koristi i koliko plaća za istu. Nisam dobio odgovor za prošlu godinu, a dobio sam odgovor za osam lica, a mislim da ih ima 18 koji koriste javnu površinu. Nemam ništa protiv da se površina koristi, ali sam protiv da se koristi, a da se ne plaća. Komunalni inspektor nam očito nije potreban, te bih zamolio pomoćnicu načelnika da se pozabavi ili inspektorom ili njegovim nadležnostima.

RASIM ŠEHIĆ – vijećnik SDA

Inicijative:

1. Da se na liniji 29 "Sutjeska-Kamenica" u skladu sa normama, te dužinu puta kojom saobraća ova linija, dodijeli novi autobus primjeren za ovu liniju sa polascima iz Kamenica u 06:20h i sa Sutjeske u 13:40h.

Obrazloženje: Putnici koji putuju na liniji 29 "Sutjeska-Kamenica" sa polascima u 06:20h iz Kamenice i 13:40h sa Sutjeske, primorani su svakodnevno da putuju sa vozilom, koje izuzetno otežano vrši prevoz putnika. Naime, riječ je o starijem autobusu čija pokretnost je upitna na određenim dionicama, koje imaju izrazit uspon, jer u određenim momentima dolazi do skoro potpunog zaustavljanja pomenutog vozila. Inače, ovaj autobus ima 33 sjedišta, a autobusom se u vrijeme ovih polazaka prevozi cca 60 putnika od kojih je veliki broj primoran da stoji što možete provjeriti svojom kontrolom. Napominjem da su putnici izrazili izuzetno zadovoljstvo ranijim autobusom koji im je zamijenjen "novim", a takođe napominjem da putnici nemaju primjedbe na vozače koji izuzetno profesionalno obavljaju svoj posao obzirom na gore pomenute okolnosti.

2. Pokrećem inicijativu da se za MZ Gajevi i MZ Dragoradi iznađe mogućnost, u dogovoru sa "Centrotransom" da se odobri autobus koji bi polazio iz Dragorada u vremenskom periodu od 09h-10h, a povratak iz Sarajeva u 19:30h, od ponedjeljka do subote.

Obrazloženje: Stanovnici ove dvije mjesne zajednice nalaze se na udaljenosti 17 km od prve ambulante u Srednjem koja im je izuzetno neophodna, jer na tom području živi 180 penzionera, starih i iznemoglih osoba koje svakodnevno imaju potrebu za ovim prevozom. Pored toga, izuzetno nepovoljna pozicija je za studente ovih mjesnih zajednica koji imaju potrebu za ovim prevozom (njih 18), jer imaju svoje redovne obaveze na fakultetima do 20.jula.

3. Uputiti dopis nadležnoj firmi i Direkciji za ceste Kantona Sarajevo da se izvrši košenje trave/potkresivanje granja oko puta na relaciji D.Čevljanovići-Vrutci-Dragoradi u svrhu bezbjednijeg saobraćaja.

Pitanje:

1. Kojim danima i u kojem terminu radi matični ured u Srednjem ?

SAUDIN DURMIĆ – vijećnik SDA

Pitanje:

1. Na prethodnoj sjednici postavio sam pitanje vezano za razgraničenje putne komunikacije na području MZ Misoča, koje sam postavio na inicijativu građana MZ Misoča. U odgovoru nadležne službe stoji da MZ Misoča treba pokrenuti pomenutu inicijativu.
Tražim da nadležna služba odgovori zbog čega ja kao legitimno izabrani predstavnik građana ne mogu pokrenuti inicijativu. U članu 5. i 6. Poslovnika Općinskog vijeća Ilijaš jasno su data prava i dužnosti vijećnika.
Stoga, ponovo pokrećem istu inicijativu uz zahtjev MZ Misoča (u prilogu).
2. Zbog čega nisam dobio odgovor na pitanje vezano za regulisanje i uređenje izbornih područja na području MZ Ilijaš Stari i Ilijaš Grad.

BESIM GLJIVA – vijećnik Stranke za Srednje

Inicijative:

1. Neophodno je sanirati lokalni put od Vukasovića do Homara obzirom da istim saobraća minibus koji vrši prevoz đaka. Put je makadamski i ne iziskuje velika sredstva, osim što zahtjeva hitnost sanacije kako ne bi bio obustavljen prevoz đaka iz ovih naselja.
2. U vrijeme đачkih raspusta, područja MZ Dragoradi i Gajevi i naselja koja gravitiraju istim, ostaju bez minimuma adekvatnog prevoza. Potrebno je uvesti najmanje jednu minibusku liniju sa polaskom iz Dragorada ujutro između 09 i 10 h, a povratkom iz Sarajeva između 19 i 20h.

ENES DIZDAREVIĆ – samostalni vijećnik

Vezano za rente i zakupe za javne površine, malo mi neke stvari nisu jasne. Naime, slastičarna "Zambak" 60 m² od 01.05. do 15.10.2014.godine iznos 1650 KM (plaćanje u dvije jednake rate), picerija "Mehdijano" 54 m² od 01.05. do 31.05.2014.godine 180 KM (plaćanje u dvije rate). Neka mi neko odgovori po kom kriteriju se određuju cjenovnici i kako je ovolika razlika u cijenama ?

MELIHA AVDIBEGOVIĆ – pomoćnik načelnika za prostorno uređenje i stambeno-komunalne poslove

Zahtjevi za način plaćanja i regulisanje zakupa javne površine vrši se na osnovu rješenja nadležne općinske službe, a to je služba za prostorno uređenje i stambeno-komunalne poslove. Obaveza je svakog korisnika javne površine da podnese zahtjev za korištenje javne površine. Ukoliko ne podnese zahtjev, zahtjev za korištenje podnosi služba po službenoj dužnosti.

Znači, zahtjev se može podnijeti za cijeli period, a može i mjesečno.

MUHAMED HANDŽIĆ – vijećnik BPS-SEFER HALILOVIĆ

Dobili smo dio odgovora, a veza za uzurpiranje javnih površina od pomoćnice načelnika.

Koliko sam shvatio, zakupci koliko koriste toliko plaćaju. Ako je po tome, onda bi naši zakupci trebali plaćati zakup od 01.februara. Drugo, ne znam zašto mi vijećnici postavljamo pitanja vezano za nadležnost komunalnog inspektora kada ustvari njegova nadležnost nije ništa. Sve ovo što je upućeno pomoćnici načelnika, trebalo je uputiti komunalnom inspektoru. On je trebao podnijeti izvještaj i nije se trebalo dešavati ovo što se dešava sa baštama u pješačkoj zoni. Mogao je on to dovesti u okvire normalnog. Ako to on neće, postoji način na koji ćemo se mi njega odreći, odnosno da neko radi ko hoće. Ako nisu njegove nadležnosti, neka nam donese neko ko je njemu nadređen, na uvid njegove nadležnosti. Znači, dajte da vidimo može li komunalni inspektor uredovati pješačku zonu i sve ono što se tiče uzurpiranja javnih površina na općini Ilijaš, a ako ne može da se obraćamo nekom trećem.

AD-2

Izvještaj o realizaciji zaključaka sa 18.sjednice OV-a,
zaključka sa 17. i zaključka sa 16.sjednice

Diskutanata po ovoj tački dnevnog reda nije bilo, pa je OV-e sa 20 glasova ZA i 1 UZDRŽANIM usvojilo

Izvještaj o realizaciji zaključaka sa 18.sjednice OV-a,
zaključka sa 17. i zaključka sa 16.sjednice

AD-3

Informacija Civilne zaštite Općine Ilijaš o trenutnom stanju na području općine Ilijaš,
prouzrokovano elementarnim nepogodama

ZDRAVKO BARIĆ – pomoćnik načelnika za Civilnu zaštitu

Zahvalio bih se svima koji su bili u prilici da ovih zadnjih petnaest dana uzmu učešće u nemilim dešavanjima tj. posljedicama koje su izazvale enormne količine kiše, prije svega na području kantona, FBiH, pa i čitave naše države. Mi smo bili angažovani do našeg operativnog centra, operativnog centra policije, predsjednici savjeta mjesnih zajednica, a onda i dobrovoljci i svi građani koji su bili upućeni u akcije spašavanja ljudi, imovine i sprječavanja nastanka većih šteta. Neke naše mjesne zajednice nisu imale veće štete (Gajevi, Dragoradi, Kamenica), a manje štete su bile u MZ Mrakovo i MZ Lješevu. U MZ Ljubnići, put za Banjer je oštećen, u Podlugovima je pogođeno bilo područje uz rijeku Stavnju, uz Gnionicu smo imali klizište (ali ovo su sve manje štete).

Na Karašnici imamo nekoliko klizišta, u Kadarićima imamo problem gdje je obala toliko uništena i gdje su kuće ugrožene, između Kadarića i Ljubnića imamo jedno klizište koje nije većih razmjera. Tu smo imali izlivanje rijeke Bosne na imanje Mujanovića.

U MZ Misoča je bilo kritično prvu noć, a entuzijasti, mjesna zajednica, firma SPO niskogradnja Durmić su djelovali pravovremeno, neke kuće su spašene, zatim djelovanjem firme Bilal d.o.o. spriječeno je pucanje glavnog vodovoda koji ide od vodozahvata.

Za MZ Ilijaš Stari mogu reći da je bilo prva dva-tri dana dobro, a onda su se pojavila klizišta i to je sada u fazi mirovanja.

MZ Luka – prvu noć je bilo najkritičnije kod škole u Bioči, zatim su se aktivirala nova klizišta. Uništeni su lokalni putevi.

MZ Malešići – imamo tri klizišta, oštećenih kuća, a jednu noć smo imali evakuaciju, ali za sada je stanje uredu.

U MZ Ljubina uz MZ Srednje je bilo najviše šteta. Aktivirano klizište u D.Čevljanovićima

gdje je 12-ak kuća ugroženo, iseljene su porodice Osmanović, aktivirano klizište u Srednjem, a imamo i nekoliko klizišta u samom naselju prema školi. Klizišta su u fazi mirovanja, ali niko to ne garantuje. Područje Solakovića je možda i teže pogođeno nego Srednje.

Ono što možda vas interesuje jeste o posljedicama. Mi smo dužni da Vladi Kantona Sarajevo dostavimo podatke o preliminarnim štetama. Naše štete, po procjeni, iznose cca milion KM. Većina šteta se odnosi na sanaciju lokalnih puteva, sanaciju klizišta i uređenje korita rijeka. Štete na objektima nisu trenutno velike. Štete na usjevima su cca 75.000 KM. Želim reći još da je Crveni križ od prvog dana uzeo učešće u svim akcijama, zatim mladi svih organizacija i udruženja su pomogli i mediji koji su sve pratili.

MARIONETA ILIĆ – JURETA – vijećnica SDP-a

Želim samo još jednom da se ponove prioriteti rada u daljem periodu, pošto su i dalje aktivna klizišta, pa bi oni trebali da budu prioritet.

MUHAMED HANDŽIĆ – vijećnik BPS-SEFER HALILOVIĆ

Prvo ću zamoliti predsjedavajućeg da pruži priliku predsjednicima MZ da se obrate po ovoj tački, ako za to imaju potrebu. Zatim, bilo bi nekorektno da se ne zahvalimo gospodinu Bariću i načelniku općine Ilijaš gospodinu Fazliću koji su bili cijelo vrijeme ovih nesreća nama svima na raspolaganju, kako predsjednicima MZ, tako građanima, tako vijećnicima, i sa malim brojem članova Civilne zaštite uspjeli smo da angažujemo ljudske resurse na terenu, naravno i one kapacitete mašina koje su već pomenute, te riješiti donekle probleme općine. Sagledavanje posljedica ove nesreće će tek biti za jedan mjesec dana, klizišta su još aktivna, i nije očekivati da se ona rješe jer velika su sredstva potrebna za njihovo potpuno rješavanje. Puteve ćemo morati što prije rješavati, put prema Bioči je skoro pa onespособljen, i pitanje je kada će biti potpuno obustavljen saobraćaj. U ime građana Luke i Bioče, želim da vam se zahvalim što se brzo intervenisali na području kod Biočkog mosta i spriječili ste pravu katastrofu, da Luka ne bude poplavljena otprilike 50%.

SAUDIN DURMIĆ – vijećnik SDA

Iskoristiću priliku da se i ja, u svoje ime i u ime kluba vijećnika, zahvalim Civilnom štabu, načelniku i svim sudionicima ovih događaja, i evo jedna sugestija, da se u narednom periodu kada budemo stavljali ove prioritete, povede računa gdje su ugroženi stambeni objekti, ljudi, stanovanja. Mi znamo da će se štete tek pokazati, kako je rekao Handžić, te da se djeluje interventno, da u narednom periodu ozbiljnije pristupimo, kako i sami građani, tako i službe.

SELVER HERIĆ – vijećnik SDP-a

Očevidci smo ovih dešavanja, kako u BiH, tako i u našoj općini, jer se i u našoj općini na terenima izdešavalo mnogo, što se tiče odrona, klizišta, nabujale rijeke i ostalog. Moram ovom prilikom reći, da se osjetio nesavjestan rad ljudskog faktora, uzurpacijom rijeka, korita, sužavanjem, bacanjem svega u rijeku, te su tako doprinjeli većem vodotoku, da izazovu klizišta, i savjesni građani moraju reagovati, da nam se ovo ne bi više desilo. Imam za obavezu pojedince i firme da istaknem, da im se zahvalim jer su dali maksimalan

doprinos u rješavanju problema.

MIRSAD HAMZIĆ – predsjednik MZ Malešići

Moram istaći zahvalnost i saradnju sa Službom Civilne zaštite, na čelu sa Zdravkom Barićem, sa načelnikom koji je bio u koordinaciji sa mnom, ali smatram i sa kolegama. Posebno mi je drago istaći da smo bili jedan tim koji je radio na svim MZ, i dali svoj doprinos ovoj situaciji koja nas je zadesila. Slažem se sa nekim vijećnicima koji su već kazali da odmah krenemo sa nekim stvarima što se tiče projekata sanacije puteva, nekih prioriteta gdje bi mogli odmah da djelujemo, jer još uvijek ne znamo da li je prestala ova agonija sa kišama, pa da ne bi dolazilo do toga.

AKIF FAZLIĆ – načelnik

Prije svega želim da se zahvalim na ovim lijepim riječima, još ako su iskrene i objektivne, onda možemo reći da smo uradili ono što se trebalo uraditi. Ja mislim da smo se uspjeli "odbraniti" u tom periodu padavina i poplava, ali opet najviše zahvaljujući onome što prije nije bilo, a to je puni angažman stanovnika, ne samo institucija. Vjerovatno smo shvatili veličinu problema koji nas je zadesio i to je dalo pravi rezultat. Što se tiče institucija, pohvalno je reći da je tu angažman bio koordiniran i organizovan, i kroz dosta aktivnosti koje su provedene dali su jako dobre rezultate. Prije svega na zaštiti od plavljenja, gdje se moglo zaštititi, na radu da putevi budu gotovo prohodni, na onome da nam je praktično sve funkcionisalo. Ja ću spomenuti da sve stvari koje smo dobro uradili i stvari koje smo nekad preventivno uradili dobro, dale su rezultat. Što se tiče pitanja vodosnadbijevanja, na takvoj mutnoj rijeci i rada filter stanica mi nismo imali prekida u vodosnadbijevanju. Gradski vodovod je omogućavao cijelo vrijeme snadbijevenost. Kada su u pitanju klizišta uradilo se ono što se radi preventivno, a to je stavljanje najlona, prokopavanja kanala, i odvodnih cijevi. Najveće štete su nam na makadamskim putevima, a kad su u pitanju vodotoci, rijeka Ljubina i potok Povoća, zahtijevaju da se u nekom kratkom periodu sanira korito. Mi smo pokrenuli projekat za izradu sanacije vodotoka Ljubina, te projekat za izradu saobraćajnice za Solakoviće i Povoću, te se nadam da će to biti uskoro realizirano. Zavod za izgradnju prevashodno će se orijentirati da obezbijedi sredstva za sanaciju klizišta. Prema njihovim procjenama, 2 miliona maraka bi bilo nužno odmah obezbijediti za klizišta na području Vogošće i Ilijaša. Što se tiče inicijativa koje ste danas ovdje dali, mogu reći da se slažem kada su u pitanju prioriteti i pokrenućemo odmah radove na sanaciji, prije svega ovih makadamskih puteva i kada su u pitanju ovi odvodi koji ugrožavaju klizišta. Problem sa obnovama i sanacijama neće biti jednostavan i brz. Budžeti na svim nivoima imaju sada dnevne prilive, nama je sada za nekih 70% manji nego što je to bilo ranije. Moramo biti spremni i očekivati da će to još potrajati, jer se oporavak, posebno što se tiče poljoprivrede neće brzo desiti. Također, moram još spomenuti da su naši građani i naše institucije puno pomogli ugroženim općinama, da je preko našeg budžeta, organizovan odlazak u Maglaj, Olovo, te da je skupljeno dosta humanitarne pomoći, da su se doselile tri porodice iz Topčić Polja u Kadariće.

Predsjedavajući je zaključio raspravu te dao na glasanje zaključak predložen od strane vijećnice Marionete Ilić-Jurete, da se današnja dnevnicu izdvoji za poplavljena područja, sa dopunom da se to konkretno odnosi na Olovo. Općinsko vijeće je jednoglasno usvojilo slijedeći

ZAKLJUČAK

Dnevnice vijećnika Općinskog vijeća Ilijaš sa 19.sjednice održane dana 29.05.2014.godine usmjeriti za poplavljena područja Općine Olovo.

AD-4

Prijedlog Odluke o privremenom korišćenju javnih površina na području općine Ilijaš

MELIHA AVDIBEGOVIĆ – pomoćnica načelnika za prostorno uređenje i stambeno-komunalne poslove

Privremeno korištenje javnih površina u dosadašnjem periodu bilo je regulisano odlukom iz 2009. godine, koja je donešena na osnovu Zakona o privremenom korištenju javnih površina na području Kantona Sarajevo, koji je naložio donošenje općinskih propisa kojima će se definisati visine naknada, način plaćanja i efiksan način realizacije tih utvrđenih iznosa. Usljed potrebe za usaglašavanjem određenih izmjena na terenu pojavila se potreba za izmjenom predmetne odluke, a obzirom da se mijenjalo više od polovine tih članova ove, još uvijek, važeće odluke radi lakše primjene, mi smo se odlučili za donošenje nove odluke. Ovom odlukom koja je na dnevnom redu, mi smo definisali četiri, umjesto tri zone, odnosno, uveli smo Nultu zonu, to je novoizgrađena pješačka zona. Osim sadržaja koji su navedeni ovom odlukom i tačno definisani, mogu se javne površine koristiti i za postavljanje uređaja za neke određene namjene ukoliko to bude potrebno. Postupak dodjele lokacija za sve namjene, osim za kioske, je takav da korisnik podnosi zahtjev podnosi Službi za prostorno uređenje i stambeno-komunalne poslove. Ukoliko korisnik javne površine ne podnese zahtjev za korištenje javne površine, po službenoj dužnosti Služba izdaje rješenje i to rješenje ostaje na snazi sve do momenta korištenja javne površine. Za kioske javna površina se dodjeljuje na osnovu javnog poziva. Visina naknade za korištenje javnih površina utvrđena je u članovima od 16. do 34. ove Odluke, te smatramo da visina naknada za korištenje javnih površina nije velika, da će korisnici tih javnih površina plaćati te javne površine. Služba je kroz nacrt Odluke stavila veće cijene, međutim, one su se kroz javnu raspravu smanjile, i gotovo su ostale na nivou cijena koje su bile definisane ovom prethodnom Odlukom. Što se tiče naknade, ona se plaća odmah, a za druge namjene može se plaćati u dvije rate ili mjesečno, zavisi od namjene kako je to definisano ovom Odlukom. Ovom Odlukom je definisano da je javna površina ispod nadstrešnica, čiji investitori su bili vlasnici ugostiteljskih objekata koji koriste javnu površinu, i za sve ostale namjene navedene u članu 40. se ne plaća. Ukoliko investitor nije platio naknadu za prethodnu godinu ne može mu se izdati rješenje za korištenje javne površine, a Služba pokreće postupak prinudne naplate preko nadležnog općinskog suda. Nadzor nad ovim javnim površinama vrši općinski, komunalni i građevinski inspektor, a isto tako, Odlukom su određene kaznene odredbe i za fizička i za pravna lica, u iznosu od 500 do 5.000 KM. Međutim, ovdje postoji i neusaglašenost zakona, a to je zakon o korištenju javnih površina na području Kantona Sarajevo i Zakona o komunalnim djelatnostima, gdje je kroz Zakon o komunalnim djelatnostima nadležnost nad ovakvim nadzorom definisana kao nadležnost komunalnog inspektora KS.

U vrijeme održavanja manifestacije "Ilijaški dani" slobodne javne površine na privremeno korištenje dodjeljuje Organizator manifestacije, ali ne po manjoj cijeni nego kako je to utvrđeno ovom Odlukom.

Javnu površinu mogu koristiti pravna i fizička lica, pravna ukoliko imaju registrovanu djelatnost, a fizička lica ako imaju odobrenje za obavljanje određene djelatnosti. Odluka je bila u nacrtu, provedena je javna rasprava, bilo je nekoliko prisutnih zainteresovanih iz ove ulice i shodno njihovim zahtjevima skoro sve njihove primjedbe su prihvaćene, ugrađene u ovu Odluku, Komisije nisu imale primjedbi, i ja predlažem da se Odluka usvoji.

RASIM ŠEHIĆ – vijećnik SDA

Ja sam se javio po pitanju ove naknade za "Ilijaške dane", da pitam predlagača Odluke, je li to ostavlja organizacionom odboru da oni odrede na koji način će se plaćati ili to ostaje ova cijena koja je u ovom periodu?

BESIM GLJIVA – vijećnik Stranka za Srednje

U članu 19. bih da sugerišem, možda je ovo malo prevelika cijena. Naknada za postavljanje displeja i slobodnostojećih reklamnih panoa mjesečno po 1m2 površine panoa iznosi u prvoj zoni 20 KM, u drugoj zoni 15 KM i u trećoj zoni 10 KM. Ako uzmete jedan billboard ili plakat čija je dimenzija 5x2.40, to je oko 12 kvadrata. U prvoj zoni, tih 12 kvadrata puta 20 je 240 KM mjesečno, a to je gotovo 3.000 KM godišnje i mislim da nećemo prodati niti jedan, niti će biti zainteresovanih, a oni su najatraktivniji. Kada bih se iz treće zone, 10 KM, prebacilo na prvo zonu, mislim da bi tad imali šanse da omogućimo onima koji bi bili zainteresovani da postave nekoliko billboard plakata.

SELVER HERIĆ – vijećnik SDP-a

Nisam primjetio u ovoj Odluci ko ima pravo na korištenje javnih površina, odnosno, ko nema pravo, izuzev člana 38. Mislim da bi trebalo definisati da prednost korištenja javnih površina trebaju imati isključivo građani općine Ilijaš, da se član 38. izbriše i stavi da piše sva fizička i pravna lica, osim onih koji nisu izmirili obaveze u prethodnom periodu. Mislim da biste trebali ovom Odlukom, također, definisati način plaćanja "desne i lijeve strane" da bi pješaci mogli imati nesmetanu komunikaciju.

AKIF BEŠLIJA – vijećnik SBB-a

Nisam mogao naći u ovoj Odluci, a što bi trebali definisati da pokušamo odrediti "diskrecionu liniju", dokle se može izdavati ovaj prostor za usluge pojedinih privatnika, da to oni ne rade samovoljno.

MUHAMED HANDŽIĆ – vijećnik BPS-SEFER HALILOVIĆ

Ja u ovoj odluci, u članu 4. u kojem je definisano kakvi objekti, kakvi sadržaji se mogu postavljati, odnosno u koje svrhe se izdaje ovaj javni prostori, nisam vidio fontane niti betonske podije, a nije definisano niti jednim od članova, izuzev u članu 4. gdje je ostavljen prostor "za advokate" gdje piše da pravno ili fizičko lice putem zahtjeva dobija suglasnost za postavljanje tih pokretnih sadržaja. Dakle, u ovoj odluci, nema ni fontana niti betonskih podija, a ako ja griješim neka me predlagač ispravi. Neke sklone postojeće sadržaje ili ova odluka za mene nije validna.

BESIM GLJIVA – vijećnik Stranke za Srednje

U članu 40. pod c) stoji "za potrebe političkih organizacija u svrhu prikupljanja potpisa, održavanja političkih tribina i predizbornih skupova". Ja bih ovdje dodao da ovo ne važi u jeku predizborne kampanje. Takođe mislim da bi možda trebalo dodati jedan član ili obuhvatiti odlukom, kako bi se mjesta obezbjedila za dvije manifestacije (Čevljanska korida i Ilijaški dani) – slobodnostojeće svjetleće panoe u ovoj glavnoj ulici.

MELIHA AVDIBEGOVIĆ – pomoćnica načelnika za prostorno uređenje i stambeno-komunalne poslove

Organizator Manifestacije Ilijaški dani daje javne površine u zakup, ali ne po manjoj cijeni, nego kako je to utvrđeno Odlukom. To je početna najmanja cijena, a stvar je organizatora kolika će to cijena biti za zakup određenih namjena. Što se tiče bildboarda, bila je javna rasprava, na inicijativu i određen broj građana Služba je cijene predložila. Vi se izjasnite, da li želite danas ili na nekoj narednoj sjednici da se definišu cijene, ako ima za to potrebe. Što se tiče visine cijena, definisanih članom 19., naknada za postavljanje displeja i slobodnostojećih svjetlećih panoa, mogu reći da imamo vrlo malo zahtjeva za postavljanje panoa, ili postave bespravno ili je to nadležnost upravitelja cesta. Najčešće su to regionalne, magistralne ceste i autoput. Uz ceste koje su u nadležnosti općine mi nemamo takvih reklamnih panoa. Vlasnici poslovnih prostora koji su finansirali nadstrešnice, gledano sa lijeve strane, ne plaćaju tu naknadu. Definisanje tog prolaza će se odrediti sad po usvajanju ove Odluke, jer ovo nije bilo definisano starom odlukom. Vrlo je teško definisati prostor, posebno ovdje, izlazi se na teren za svaki poseban zahtjev. Moja ideja je bila postavljanje prostirača na ove ploče ili da naprave posebnu platformu koja je samo malo podignuta ispred. Mi ćemo vjerovatno u nekom narednom periodu to i uraditi. Što se tiče fontana u samoj ulici, one su definisane i dato im je odobrenje za izgradnju kroz odobrenje pješačke zone. Za sve ostale fontane, ako gospodin Muhamed misli na fontanu objekta gospodina Šehića, ona ima odobrenje za vanjsko uređenje uz rješenje za izgradnju poslovnog prostora. Gospodin Besim je spominjao član 40. pod c), i ja mogu reći da je ovdje tačno navedeno u koje namjene se ne plaća. Ovdje nije navedeno da se ne plaća za plaketiranje, jer mi imamo slučaj da su svi plaćali u predizbornim aktivnostima. Ovdje je navedeno da se besplatno izdaju stolovi u svrhu prikupljanja potpisa, održavanje političkih tribina, i predizbornih skupova. Svi koji žele da plaketiraju predizborne aktivnosti, podnose zahtjev Službi i dobiju rješenje.

MUHAMED HANDŽIĆ – vijećnik BPS-SEFER HALILOVIĆ

Ja ove slike nosam 2-3 mjeseca i govorim o novoizgrađenoj fontani bez ikakve dokumentacije, i bar neka nam se pokaže ta suglasnost za uređenje vanjskog prostora o kojoj vi pričate. Meni treba taj dokument jer sve ostalo imam. Dakle, govorim o fontani ispred privatnog ugostiteljskog objekta "Mistik", koje nema u Regulacionom planu, a ne o drugim fontanama koje su ucrtane, koje vi spominjete.

ALAN ŠERAK – vijećnik SDP-a (Poslovnička intervencija)

Smatram da trebamo dopustiti pomoćnici načelnika da se izjasni da li je prihvatila određene prijedloge vijećnika, ako jeste da pristupimo glasanju samih prijedloga Odluke.

AKIF FAZLIĆ – Načelnik

Ja ću predložiti jedno kompromisno rješenje. Što se tiče cijena, meni je Služba donijela Odluku i ja sam korigovao sve cijene naniže, i predlažem da se sve cijene smanje po 5 KM, da bude 15, 10 i 5 KM, da tako ostanu, u članu 19., a što se tiče ovih "diskrecionih linija", one će očitito biti potreba, ali ne možemo sad na pauzi definisati te detalje te predlažem da ovakvu Odluku usvojimo, uz neke izmjene i dopune za nekih mjesec-dva. Javni interes je ovo vijeće utvrdilo na osnovu Ilijaških dana, kada je u pitanju korida vijeće nije utvrdilo javni interes nikad svojom odlukom. Ako se utvrdi takav javni interes onda nije problem za isti status, ovako ulazimo u nešto što jeste osjetljiva stvar.

Predsjedavajući je zaključio raspravu po pitanju četvrte tačke, sa izmjenom u članu 19. i stavlja Odluku na glasanje.

Općinsko vijeće je sa 17 glasova ZA i 1 UZDRŽANIM glasom donijelo

Odluku o privremenom korišćenju javnih površina na području općine Ilijaš

AD-5

Prijedlog Odluke o davanju saglasnosti za zaključenje ugovora o korištenju gradskog nogometnog stadiona u Ilijašu

SANJA ZAGORAC-JOZIĆ – pomoćnica načelnika za društvene djelatnosti

Moram odmah napomenuti da je Komisija za statut i propise dala pozitivno mišljenje razmatrajući prijedlog ove odluke i nije imala primjedbi na pravni osnov i pravno-tehničku usklađenost odluke. Ono što je predlagač želio na ovoj sjednici je da predloži neke izmjene u samom ugovoru, a to je proisteklo iz davanja sugestija sportskih kolektiva koji trenutno koriste resurse gradskog nogometnog stadiona, pa je Služba za društvene djelatnosti uz odobrenje općinskog načelnika kao predlagača ovog dokumenta, a u skladu sa članom 132. stav 2. Poslovnika Općinskog vijeća Ilijaš, da predlagač može podnositi amandmane na svoj prijedlog sve do zaključenja rasprave o prijedlogu, predlaže slijedeće: da se u članu 7. ovog ugovora o korištenju nogometnog stadiona u Ilijašu, na kraju stava 1. brišu riječi, "a u skladu sa mogućnostima raspoloživih slobodnih termina", a dodaju se riječi, "pri čemu termini nogometnog kluba Ilijaš imaju prioritet". Također, u članu 9. ugovora iza stava 1. dodaje se novi stav koji glasi: "U cjenovniku za usluge korištenja sportskih sadržaja klubovima koji se finansiraju iz budžeta općine Ilijaš obračunavat će se samo stvarni troškovi neophodni za realizaciju sportskih aktivnosti". Stav 2. postaje stav 3.

SELMA PUŠINA – vijećnica SDA

Podnosim amandman na član 6. Ugovora o korištenju koji je sastavni dio navedene odluke, a tiče se izdavanja pod zakup dijela ili kompletnog građevinskog objekta trećim licima, da se navedeni može izdavati u djelatnosti vezane u funkciju sporta i sportskih aktivnosti, kao i za djelatnosti ugostiteljstva uz zabranu točenja i prodavanja alkohola.

Obrazloženje: Pomenuti amandman upućujem u cilju spriječavanja i navikavanja na poroke, što je jedna od glavnih funkcija sporta.

MUHAMED HANDŽIĆ – vijećnik BPS-SEFER HALILOVIĆ

Imam pitanje za predlagača, a odnose se na kalendar obilježavanja značajnih datuma i ličnosti. Naime, svake godine organizujemo turnir "Hašim Spahić", te pitam da li će se u te svrhe vršiti naplata. Mislim da bi trebalo ugraditi u odluku ili ugovor da se sve manifestacije značajne za općinu daju besplatno.

Predlažem amandman na ugovor, a vezano za član 3. gdje piše da se objekti daju na period od pet godina, a ja predlažem da se daju na period od dvadesetpet godina. Mislim da u ovom kratkom periodu se neće ništa investirati, a ako damo na duži period, mislim da će taj ko dobije na korištenje vršiti i određena ulaganja.

SANJA ZAGORAC-JOZIĆ – pomoćnica načelnika za društvene djelatnosti

Amandman vijećnice Selme Pušina se može prihvatiti, a što se tiče prijedloga vijećnika Muhameda Handžića mislim da je članom 3. i 11. definisano to da se manifestacije koje se organizuju pod pokroviteljstvom općine Ilijaš, uključujući i memorijalni turnir "Hašim Spahić" su bez naknade. Produženje roka na dvadesetpet godina, iz iskustva, mislim da nisu baš adekvatni. Ne znam šta načelnik misli o tome.

MUHAMED HANDŽIĆ – vijećnik BPS-SEFER HALILOVIĆ

Mislim da je pet godina zapravo samo produženje agonije. Ljudima treba dati priliku. Ako drugi mogu dobiti na raspolaganje stadion na period od 99 godina, zašto FK Ilijaš ne može na dvadeset i pet godina? Zašto sputavati pokušaj da se ostvari neki napredak? Trebamo to podržati i pomoći. Ti ljudi ne trebaju biti žrtve različitih politika. Ja, ustvari, nisam za to da se im se da tako kratak rok.

AKIF FAZLIĆ- načelnik

Sve dileme koje smo imali oko ostalih odredbi u ovom ugovoru, su sada jasne i saglasni smo oko njih. Ovo što je vijećnik Handžić pokrenuo je zaista jedno od suštinskih pitanja. Moram priznati da ja, kao načelnik, u saradnji s resoornom službom, nisam imao hrabrosti istupiti s takvim prijedlogom ranije. Moramo razmijeniti mišljenja, razgovarati jer zaista je razlika ovo pet godina i dvadeset godina. I jedan i drugi prijedlog ima svoje pozitivne i negativne stvari, a ja kao načelnik prepuštam vijeću da donese odluku.

SANJA ZAGORAC-JOZIĆ – pomoćnica načelnika za društvene djelatnosti

Nakon obavljenih konsultacija bilo je različitih prijedloga, i pošto se ide na to da se stvari gledaju malo perspektivnije za jedan dugoročniji period, da ne bismo pogriješili, predlagač predlaže da se izjašnjavanje po ovoj tački dnevnog reda odgodi za narednu sjednicu, ukoliko postoji mogućnost da se dokument doradi i predloži za slijedeću sjednicu.

Konstatovano je da se izjašnjavanje po ovoj tački dnevnog reda odlaže za narednu sjednicu Općinskog vijeća.

Prijedlog Odluke o davanju saglasnosti na Godišnji plan gospodarenja šumama za ŠPP "Gornjebosansko" za 2014.godinu

MERIMA OSMANOVIĆ – pomoćnica načelnika za privredu, finansije i investicije

Članom 11. stav 3. Zakona o šumama Kantona Sarajevo definisano je da korisnik šuma treba dostaviti godišnji plan realizacije šumsko privrednih osnova Upravi za šumarstvo radi davanja saglasnosti na isti, uz prethodno pribavljeno mišljenje općine na čijem će se području izvoditi radovi predviđeni godišnjim planom. Pošto je plan realizacije šumsko-privredne osnove za 2014.godinu usklađen sa planovima gospodarenja nove šumsko-privredne osnove za ŠPP "Gornjebosansko" na koje nije bilo primjedbi od stručne komisije za pregled šumsko privredne osnove, ne smetaju za davanje pozitivnog mišljenja za davanje saglasnosti na plan.

U prilogu Odluke imate plan realizacije za ŠPP "Gornjebosansko" koji se sastoji od:

- plan sjeća
- plan šumsko-uzgojnih radova
- zaštita šuma od štetnih insekata
- plana investicija.

BESIM GLJIVA – vijećnik Stranke za Srednje

Ja bih samo želio znati da li mi možemo kroz usvajanje Odluke na neki način dati određene uslove, usloviti eksplatatora šume većim ulaganjem na nekim mjestima odakle eksplatiše šumu, prije svega u lokalne zajednice, bolje održavanje putne infrastrukture za koju oni tvrde da je njihova. Da li mi možemo kroz davanje saglasnosti na ovu Odluku spriječiti neke radnje koje nisu dobre ni za općinu Ilijaš, ni za područja odakle se eksplatišu ti prirodni resursi.

SEAD ŠEHIĆ – vijećnik SBB-a

Postavio bih jedno pitanje, a to je njega šume i zaštita od insekata. Da li je predviđeno, gdje, kako i koliko da se izvrši prskanje ? Da li neko vodi računa o tome ?

MUAMER DERVIŠEVIĆ – vijećnik SDA

Od izuzetne je važnosti da damo saglasnost na ovaj godišnji plan gospodarenja šumama iz razloga što u Sarajevo-šumama radi jako puno ljudi sa gornjeg područja općine. Na kraju ovdje vidimo i plan investicija, te je i to jako bitno.

MERIMA OSMANOVIĆ – pomoćnica načelnika za privredu, finansije i investicije

Vidjeli ste u dnevnom redu da je zadnja tačka informacija službe o eksploataciji kamena, odnosno šuma i dati su određeni podaci. Sve podaci su prikupljeni od preduzeća koje gazduje šumama, a to je "Sarajevo-šume" i Uprava za šumarstvo Kantona Sarajevo, obzirom da općina, u skladu sa zakonom, nema nadežnosti u ovoj oblasti. U skladu s tim, pozvali smo predstavnike firme Sarajevo-šume i Uprave za šumarstvo, te bih zamolila direktora "Sarajevo-šuma" da se obrati.

DAMIR FILIPOVIĆ – predsjedavajući OV-a

Mislim da bi možda bilo povoljnije da se direktor obrati na tački "Informacija iz oblasti šumarstva i eksploatacije kamena".

AKIF FAZLIĆ – načelnik

Ono što je bitno da danas kažemo i poručimo , prije svega, Kantonalnoj upravi za šume i svim onim koji su nosioci izrade planova za gazdovanje šumama jeste da ovo Vijeće ne želi više davati saglasnosti na godišnje planove. Želimo novu šumsko-gospodarsku osnovu i da ovo Vijeće da saglasnost na tu osnovu. Znamo da se godišnji planovi više donose po potrebi vezano za preduzeće, a o radu preduzeća ćemo govoriti pod zadnjom tačkom. Sada govorimo o šumi, zaštiti šume i o kapacitetima šume. Ovdje se govori i o politici gospodarenja šumama. Znamo da je ovo jako važan akt za rad našeg preduzeća i u poziciji jesmo da damo suglasnost na ovu odluku i cijenim da je ovaj plan prošao sve stručne meritorne ocjene i da je korektan, ali za narednu godinu ili do kraja godine da se izađe sa novom šumsko-privrednom osnovom. Ovo je možda jedan zaključak.

DAMIR FILIPOVIĆ – predsjedavajući

Dao je na glasanje predloženi zaključak, pa je OV-e jednoglasno donijelo slijedeći

ZAKLJUČAK

Općinsko vijeće Ilijaš traži od Uprave za šumarstvo Kantona Sarajevo da se od 2015.godine počne primjenjivati nova šumsko-privredna osnova za ŠPP Gornjebosansko.

Zatim je OV-e jednoglasno donijelo

Odluku o davanju saglasnosti na Godišnji plan gospodarenja šumama za ŠPP
"Gornjebosansko" za 2014.godinu

AD7

Prijedlog Odluke o odbijanju ponude o preuzimanju neizgrađenog građevinskog zemljišta
(k.č.br.41/7, 41/8, 41/9 i 41/10)

SADETA BRKIĆ – pomoćnica načelnika za imovinsko-pravne poslove, geodetske poslove i katastar

Službi za imovinsko pravne poslove, geodetske poslove i katastar Općine Ilijaš pismenim putem obratili su se sa zahtjevom Popić Zorka, Popić Mirjana i Popić Milorad putem punomoćnika advokata Eterović Amile iz Sarajeva sa prijedlogom i ponudom za preuzimanje građevinskog zemljišta opisanog u tački 1. Odluke, po cijeni od 30,00 KM/1m² zemljišta. Za ponuđeno zemljište iz člana 1. ove Odluke Općina Ilijaš nije zainteresovana iz razloga nemogućnosti isplate za preuzeto zemljište zbog nedostatka novčanih sredstava. Iz naprijed navedenih razloga predlaže se Općinskom vijeću da usvoji predloženi prijedlog Odluke donesene u skladu sa članom 25. stav 2. Zakona o građevinskom zemljištu ("Sl. novine FBiH" br. 25/03, 16/04, 67/05).

Diskutanata po ovoj tački dnevnog reda više nije bilo, pa je OV-e jednoglasno donijelo

Odluku o odbijanju ponude o preuzimanju neizgrađenog građevinskog zemljišta
(k.č.br.41/7, 41/8, 41/9 i 41/10)

AD-8

Prijedlog Odluke o prestanku statusa nepokretnosti u općoj upotrebi zemljište označeno
kao k.č.br.587/5

SADETA BRKIĆ – pomoćnica načelnika za imovinsko-pravne poslove, geodetske poslove
i katastar

Služba za imovinsko pravne poslove, geodetske poslove i katastar Općine Ilijaš po službenoj dužnosti pokrenula je postupak rješavanja imovinsko pravnih odnosa na naprijed navedenom zemljištu na kojem je predviđena izgradnja pumpne stanice distributivnog cjevovoda u sklopu vodovodnog sistema Gornji Malešići tj. na zemljištu označenom kao k.č.br. 587/5 K.O. SP_Donja Vogošća u površini od 5 m2 koje je upisano u Iskazu I kao javno dobro. U postupku rješavanja Služba za prostorno uređenje i stambeno komunalne poslove Općine Ilijaš svojim rješenjem br. 05/1-23-563/14 od 26.03.2013. godine izdala je urbanističku saglasnost Općini Ilijaš kao investitoru za izgradnju distributivnog cjevovoda u sklopu vodovodnog sistema Gornji Malešići kao i izgradnju pumpne stanice na planiranoj trasi cjevovoda. Odsjek za katastar izvršio je identifikaciju i cijepanje parcele k.č.br. 587/2 K.O. SP_Donja Vogošća od koje je nastala parcela k.č.br. 587/5 K.O. SP_Donja Vogošća, izradili prijavni "A" list i isto prosljedili Zk. Uredu Općinskog suda Sarajevo na provedbu. U postupku rješavanja ova Služba je utvrdila da se u naravi radi o zemljištu upisanom u Iskazu I kao javno dobro – put i da je neophodno kao predhodno pitanje u postupku potpune eksproprijacije za izgradnju distributivnog cjevovoda u sklopu vodovodnog sistema Gornji Malešići kao i izgradnje pumpne stanice na planiranoj trasi donijeti Odluku o gubitku statusa nepokretnosti u skladu sa članom 1. dispozitiva ove Odluke.

Diskutanata po ovoj tački dnevnog reda više nije bilo, pa je OV-e jednoglasno donijelo

Odluku o prestanku statusa nepokretnosti u općoj upotrebi zemljište označeno kao
k.č.br.587/5

AD-9

Prijedlog rješenja iz imovinsko-pravne oblasti:

- a) rješenje broj:06/1-31-1260/14/HM
- b) rješenje broj:06/1-31-1542/14/HM
- c) rješenje broj:06/1-31-3430/12/VF
- d) rješenje broj:06/1-31-767/14/VF
- e) rješenje broj:06/1-31-1296/14/HM
- f) rješenje broj:06/1-31-482/13/VF

SADETA BRKIĆ – pomoćnica načelnika za imovinsko-pravne poslove, geodetske poslove i katastar

Naglasila je da je i za rješenje broj:06/1-31-482/13/VF stiglo pozitivno mišljenje Pravobranilaštva Kantona Sarajevo. Obrazložila je sva rješenja.

Rješenje pod a) – namjena je servisno-teretna-uslužna djelatnost. Nakon ovakve dodjele zemljišno-knjižni ured će upisati pravo korištenja radi građenja u korist Lišćevica-promet sa dijelom 1/1. Dobili smo pozitivno mišljenje Pravobranilaštva Kantona Sarajevo.

Diskutanata po ovoj tački dnevnog reda više nije bilo, pa je OV-e jednoglasno donijelo

Rješenja iz imovinsko-pravne oblasti:

- a) rješenje broj:06/1-31-1260/14/HM
- b) rješenje broj:06/1-31-1542/14/HM
- c) rješenje broj:06/1-31-3430/12/VF
- d) rješenje broj:06/1-31-767/14/VF
- e) rješenje broj:06/1-31-1296/14/HM
- f) rješenje broj:06/1-31-482/13/VF

AD-10

Informacija o izvršenju Budžeta općine Ilijaš za period 01.01.-31.03.2014.godine

MERIMA OSMANOVIĆ – pomoćnica načelnika za privredu, finansije i investicije

U skladu sa odredbama člana 30 . Odluke o izvršavanju Budžeta općine Ilijaš za 2014. godinu , Općinski načelnik je obavezan dostaviti Općinskom vijeću Informaciju o izvršenju Budžeta općine za period 01.01. do 31. 03. 2014. godine. Osnovni elementi koji su sadržani u Informaciji su: prikaz planiranih i ostvarenih prihoda za navedeni period, prikaz planiranih i ostvarenih izdataka za navedeni period i objašnjenje pojedinih stavki iz Budžeta. Informacija sadrži i uporedne pokazatelje ostvarenih veličina tekuće godine sa ostvarenim veličinama iz prethodne godine i planiranim veličinama tekuće godine. Iz općeg dijela informacije je vidljivo da je Budžet općine Ilijaš za navedeni period ostvario 1.703.311,00 KM prihoda, što je 18 % od planiranih prihoda u Budžetu za 2014. godinu. Sa druge strane, ostvareni su izdaci u iznosu od 1.710.845,00 KM, što predstavlja 18 % od planiranih izdataka u Budžetu za 2014. godinu. Prema tome ostvaren je deficit u iznosu od 7.534,00 KM. Porezni prihod od ukupno ostvarenih prihoda u izvještajnom periodu su ostvareni u procentu od 65 % ili 788.390,00 KM. U ukupnoj strukturi ovih prihoda najveći prihodi su ostvareni po osnovu poreza na imovinu kao i poreza na promet nepokretnosti. Kada se tiče neporeznih prihoda, u odnosu na planirane prihode ostvareni su u procentu od 23 % ili 469.973,00 KM . U ukupnoj strukturi ovih prihoda najveći prihodi su ostvareni po osnovu komunalnih taksi, te prihodi po osnovu naknada za izgradnju i uređenje građevinskog zemljišta i prihoda od pružanja javnih usluga. Tekući transferi su ostvareni sa 8% u odnosu na plan i iznose 431.421,00 KM. Tekući grantovi od Kantona se odnose na :

1. **Redovni tekući transferi koji su iznosili 185.317,00 KM.**
2. **Transferi za posebne namjene u iznosu od 136.104,00 KM**

U strukturi ovih namjenskih prihoda evidentirani su prihodi i to: prihodi od Ministarstva za

boračka pitanja za boračku populaciju po osnovu Zakona o dopunskim pravima boraca u iznosu od 28.811,00 KM, prihodi od Ministarstva obrazovanja Kantona Sarajevo – prevoz učenika u iznosu od: 10.435,00 KM, prihodi Ministarstva privrede: Industrijska zona Luka 53.863,00 KM, Ministarstva stambenih poslova Kantona Sarajevo Vodovod Banovac 42.995,00 KM.

3. **Primljeni transferi od Federacije**

Federalno ministarstvo za raseljena lica – izgradnja puteva na području općine Ilijaš (put Balibegovići, Ljubnići i put naselje Makljen) 100.000,00 KM

4. Tekuće transferi od Općina -Općina Novo Sarajevo 10.000,00 KM

IZDACI

Kada se tiče rashodovne strane **Bruto plaće i naknade uposlenim izvršene su u iznosu od 406.542,00 KM** i predstavlja 23 % planiranih sredstava na godišnjem nivou. Sredstva za bruto plaće ostvarena su u procentu od 24 % od planiranih, dok su sredstva za naknade uposlenim ostvarena sa 18 %. **Doprinosi poslodavca izvršeni su u iznosu od 36.472, 00 KM** i u okviru su planiranih sredstava na godišnjem nivou.

Izdaci za materijal i usluge izvršeni su u iznosu od 197.019,00 KM što je 22 % planiranih sredstava na godišnjem nivou. Struktura ove grupe izdataka je analitički prikazana u “posebnom dijelu”, i nema značajnih odstupanja i oscilacija u odnosu na plan Budžeta za 2013. godinu.

Kada se tiče pozicije **tekući transferi, evidentirani su izdaci u iznosu od 398. 271,00 KM što procentualno iznosi 18 %** od planiranih izdataka ove vrste na godišnjem nivou a u odnosu na isti period prošle godine je manje za 1 %.

U obrazloženju detaljno su obrazloženi izdaci za udruženja građana u izvještajnom periodu, i ovim putem ih nećemo pojedinačno iznositi.

Kapitalni transferi i izdaci su ostvareni u iznosu od 659.101,00 KM što je 17 % od planiranog godišnjeg iznosa. U obrazloženju Budžeta detaljno je data analitička struktura ovih izdataka i nisu predmet posebnog obrazlaganja.

Sredstva budžetske rezerve iznose od 4. 632,00 KM i čine je:

Nabavaka kontejnera za Romske porodice **3.000,00 KM**

Elektro radovi na razdvajanju potrošnje električne energije sa brojila općine Ilijaš na emisionu lokaciju Karašnica **1. 632,00 KM**

Diskutanata po ovoj tački dnevnog reda više nije bilo, pa OV-e primilo k znanju

Informaciju o izvršenju Budžeta općine Ilijaš za period 01.01.-31.03.2014.godine

AD-11

Informacija iz oblasti šumarstva i eksploatacije kamena

NEVRES ALISPAHIĆ – izvršni direktor “Sarajevo-šuma”

U 2013. godini realizovana je ukupna količina od 146 hiljada kubika što je 94.3% u odnosu na plan. Što se tiče područja općine Ilijaš, posjećeno je ukupno 46%, te možemo vidjeti da plan nije upotpunosti ispunjen, iz razloga što se u prethodnoj godini pojavilo veliki broj slučajnih užitaka, a sve je posljedica suše u 2012. godini kada je na plitkim zemljištima došlo do isušivanja, što je uzrokovano slabim imunitetom biljaka. Imali smo napada i

podkornjaka, pa smo angažovali naše ljudstvo, te smo morali smanjiti redovnu sjeću. To je cifra od 15 hiljada neto bruto drvne mase, odnosno 12 hiljada krupnog drveta sanitarnih užitaka koji smo imali vanredno. Ovo je sve u okviru etata koji je planiran za ovu godinu, za 2013. jer smo tri odjela prebacili za 2014. godinu. Što se tiče broja radnje snage i plate uposlenika, ovdje vidimo da smo prošle godine imali 427 uposlenika, od toga sa područja općine Ilijaš je 138 radnika. Treba istaći da su ovo samo uposlenici koji rade pri šumskoj upravi Srednje, veliki broj uposlenika radi pri šumskoj upravi Hadžići i Trnovo. Prosječna neto plata je 906 KM, izvršene su sve obaveze za uposlenike. Što se tiče ulaganja u šumsku infrastrukturu, u 2012. godini nismo imali nekih ulaganja, osim nešto iz vlastitih sredstava, a u 2013. godini smo imali 113 hiljada, ta vrijednost bi bila veća, međutim, operativnim planom za 2013. godinu nisu prošla sredstva koja se dodjeljuju iz Kantonalne uprave za šumarstvo. Obavezu od 5%, koliko smo dužni prema općini da uplaćujemo, nismo uspjeli isplatiti, ali se nadam da ćemo i to uspjeti realizirati. U narednom periodu planiramo 134.157 kubika neto drvne mase, na području općine Ilijaš je planirano 55.400, te moram naglasiti da je manje za nekih 7 hiljada u odnosu koliko imamo dozvoljeno po šumskoj gospodarskoj osnovi za sjeću. Za zaštitu šuma i ove godine su planirana određena sredstva, te ujedno da i odgovorim na vijećničko pitanje, za prskanje i zaštitu šume od insekata, po svim zakonima je zabranjeno prskanje na velikim površinama. U BiH posebno jer ima dosta vode, odnosno, vodozaštićenih područja, ali zato imamo druge metode a to su klopke, koje su postavljene, i to su potpuno zdravi feromoni koji imaju ukuse hrane, te se nadam da ćemo spriječiti širenje zaraza. Preduzeće je krenulo sa nabavkom dva kamiona kipera i dva skipa, kako bi pravovremeno mogli da reagujemo na svim mjestima, kada se ukaže potreba lokalnom stanovništvu.

SELVER HERIĆ – vijećnik SDP-a

Drago mi je čuti da se pošlo sa realizacijom sjeće slučajnih užitaka kojih je masa, te ovih odjela što se tiče sirovog drveta što ste prebacili za 2014. godinu. Međutim, ja sam izašao iz razloga da pohvalim saradnju Sarajevo-šuma sa lokalnom zajednicom. Navedena organizacija je u posljednje vrijeme na lokaciji Srednjeg uradila mnogo toga, a i želja nam je da nastavimo sa saradnjom. Uradili su put dužine 5 km za Visojevicu prilikom ovih nedavnih padavina, u toku je izvođenje nasipanja puteva od 3 km za selo Stomorine, planirano je nasipanje puta za staru željezničku stanicu u Donjim Čevljanovićima, i što se tiče MZ Srednje, uz naš dogovor da zajedno djelujemo, u vezi puta za Medojeviće, mi moramo iskazati zadovoljstvo.

BESIM GLJIVA – vijećnik Stranke za Srednje

Ja nisam izašao da kritikujem Sarajevo-šume, međutim, mi svi znamo da mi imamo problem sa eksploatacijom šume našeg područja. Donijeli smo danas zaključak, i on je po meni uslov da u narednoj godini nećemo dozvoliti da se radi bilo šta dok se ne donese nova privredno šumska osnova. Činjenica je da je na tom području gdje se eksplatiše šuma, veći dio puteva, kako makadamskih, tako i asfaltnih uništeno, a u njih nije ništa uloženo, u posljednje vrijeme se eksploatacija slučajnih užitaka nikako ne vrši, iz jednog razloga, da je isplativije osjeći omaru ili jeliku ili bilo koje drvo od 5 kubika, nego se baviti slučajnim užitkom jer tu nema nikakve ekonomske računice. Ja sumnjam u akte, zato što na terenu nema šume. Mi u Ilijašu se moramo potruditi da sačuvamo šume.

SELVER HERIĆ – vijećnik SDP-a

Ja razumijem kolegu Besima, jer su oni maksimalno iskoristili šume, i nemaju stope neasfaltiranog puta na području Gajeva, Dragoradi, a ja sam rekao da smo mi na mojoj MZ zadovoljni sa 10 km nasutog makadamskog puta. Ja želim da i dalje popravite što više puteva na području MZ Srednje, da se barem može u sela prići.

Obzirom da diskutanata po ovoj tački dnevnog red više nije bilo, OV je primilo k znanju

Informaciju iz oblasti šumarstva i eksploatacije kamena

Zatim je predsjedavajući Damir Filipović zaključio 19. sjednicu OV-a u 14:30h.

Zapisničar:
Maida Habibović

PREDSJEDAVAJUĆI
OPĆINSKOG VIJEĆA ILIJAŠ
Damir Filipović, dipl.pravnik, s.r.

Ul. 126. ilijaške brigade br. 6, 71380 Ilijaš
Tel. ++387 33 580-620, 580-698, fax. 400-505,
Transakcijski račun kod VAKUFSKE BANKE,d.d. Sarajevo:1602000000710645
e-mail ov_ilijas@bih.net.ba

